

太上老君說解釋咒詛經

爾時

太上老君在于闐國中仙度之所 語尹喜曰 上古之時
人民淳朴 心行正直 稟性柔和 不相嫉妒 末世浮澆
人心狡詐 不修善行 唯習凶惡 不奉大道 倚托邪
神 作法咒詛 專害人命 是時 尹喜真人稽首再拜
上告太上老君曰 憫念蒼生沈淪下鬼 魂被考劾 魄無
依倚 願賜解脫之法 諸眾生免遭枉橫
老君語尹喜曰 汝當諦聽 吾所說者 切見中古之人
專行厭禱 便於天下地上邪鬼廟社之中 畫其形像 書
其姓名庚甲 私竊咒誓 以水噴灑 以腳踐踏 努目張

太上老君說解釋咒詛經

清微藏書閣

口 種種形勢 專行無道 枉害良善 若自作 若教他
作者 令受其殃 善男子善女人 或被惡人咒詛厭禱者
皆當香湯沐浴 建立道場 請三洞道士轉誦此經 功
德不可思議 其病即瘥 若男若女被人咒詛 便可解釋
免沈身命 奉請五方五帝部從兵馬各九百萬人 為弟
子某於四面八方上下中央 剪除邪魅不祥之鬼 令弟子
福壽延長 即說咒曰
大法堂堂 天圓地方 天有九柱 地有九梁
厭咒之人 自受其殃 六柱三梁 厭蠱消亡
三梁六柱 還其本主 六甲六乙 厭蠱速出
六丙六丁 厭蠱不行 六戊六己 厭蠱不起
六庚六辛 厭蠱不真 六壬六癸 厭蠱自死

咒詛速解 急急如律令

奉請三五將軍 八風使者 九州社令 萬古將軍兵
士百千萬眾 追取厭蠱五音之人三魂七魄 付北陰天獄
咒詛惡人 精魂散越 神志猖狂 頭破作七分 一如
律令

吾今所說解除咒詛厭魅經法

若有善男子善女人得聞此經 為人轉誦 救治病難

度脫眾災 令得安樂 身強體輕 福壽延長

永無災障 冤家債主 速蒙消釋 魅害驅除

三屍墮落 得道成真 是時

老君而作偈曰

我昔遊中國 位登無上天 今來入竺國 教化諸眾生

太上老君說解釋咒詛經

清微藏書閣

九十有六種 其中各有緣 令其敬信者 展轉自相傳

精進心不退 得生無上天 有誦此經處 斯人壽命延

百靈來護衛 萬病悉皆痊 見世得安樂 身如金石堅

至真無上法 消災福自然

太上老君曰 無始以來 諸仙聖眾救度群生 便得安寧

驅蕩妖邪 解釋咒詛 凶殃散滅 吉瑞扶持 是時

大聖眾真歡喜踴躍 咸願受持 稽首叩頭作禮而退

太上老君說解釋咒詛經竟

天運辛卯年酉月正一天師清微弟子洪鼎堅羅大英恭錄彙編